

REGIONAL NEWS

HEADLINES:-

1. Governor Dr Hari Babu Kambhampati an Mizo lekhathiam hnam zingah taksa leh rilru leh ngaihtuahna hrisel turin inzirtir uar ni se a ti.
2. Lai Autonomous District Council a MDC pakua ten ZPM an zawm.
3. Tamil Nadu-ah zu chhe in avangin mi 35 an thi.
4. Bihar-a Patna High Court chuan Bihar sawrkarin sawrkar hna leh zirnaa backward class te tana chanvo a hauhsak reservation zat zaa 50 atanga zaa 65-a a tihpun chu a hnawl sak.

<><><>

YOGA

Governor Dr Hari Babu Kambhampati an Mizo lekhathiam hnam ten hriselna a pawimawh zia an hre chho zel a, taksa leh rilru leh ngaihtuahna hrisel turin inzirtir uar ni se a ti.

Naktuka khawvel pum huapa International Yoga Day hman tur puala, Raj Bhavan-a kan corr in a kawmnaah he thu hi sawiin Governor chuan Mizoramah pawh Yoga instructor engemawzaxat an awm a, hengte hian zirtirna pechhawngin, kilkhawr thlengin an dap chhuak thei a ni a ti.

Governor chuan Yoga chu taksa leh rilru hrisel nan chauh ni lovin, nunphunga betah a duhawm hle a ni a ti a, hei hi khawvel hriatah Prime Minister chuan puang tawhin, UN pawhin a pawmsak a, tunah chuan ram hrang hrangin an hlut chho hle a ni a ti.

Ayush Department hnuaia physical and stress management instructor Pi Hmingthantluangi chuan, Yoga chuan rilru hrisel nan mi a pui nasa hle a ti a, thawk lama harsatna nei tan pawh a tangkai tih sawiin, vai ho chin chhuah niin anni chuan sakhuaanaah an seng lut a, Mizote erawhin sakhuaanaah seng lut kher loin taksa sawizawi leh hrisel nan chauh a hma theih a, a hlauhawm leh tha lo zawnga sawi tur ni loin taksa hriselna tur zawk a ni tih a sawi.

Yoga lama thiamna nei Dr Lalankimi Ralte chuan, Yoga chu India ram rohlu - khawvel pawhin a ngaihsan avanga International Day hial atana a puan a ni tih a sawi a, India ramin khawvel tana a thil pek hlu ber ni hial a hrat thu sawiin, thil nget, tlo leh hahdam tak sia insawizawina a ni a ti a, a thil tum ber chu mite tih hrisel leh an natna laka chhanhim a ni, a ti. Thil danga insawzawina hlau lo tan chuan Yoga pawh hlauh ngawt chi a ni lo tih a sawi bawk.

Naktuk Zirtawpni hi International Day of Yoga a ni a, he hun lo thleng tur pual hian Assam Rifles (AR) te chuan tunkar Thawhlehi khan India leh Myanmar inrina Zokhawtharah Yoga chungchang inzirna hun an hmang a, heng bakah hian nimin khan - Lunglei, Siaha leh Zorinpuiah te inzirtirna hun hi an hmang bawk.

International Day of Yoga India ram hmun hrang hrangah hman a ni dawn a, Mizorama a hmana pui ber chu Republic Vengthlanga Hawla Indoor Stadium-ah buatsaih tur niin Larsap Hari Babu Kambhampati chuan a hman pui dawn a ni.

<><><>

PROXY

Mizoram sorkar chuan sorkar hnathawk, aikal late chu ni 30 ral hmain an hna thawk chhonzawm turin a hriattir a. Department of Personnel & Administrative Reform (DP&AR) secretary Pu K. Lalthawmmawia chuan nimin khan Office Memorandum a ti chhuak a ni.

CCS (Conduct) Rules hnuaiah sorkar hnathawkte chu an hnaa rinawm tur te, inthununna leh an tih tur leh mawhphurhna te ngaipawimawh tura beisei an ni a, thuchhuah atanga ni 30 ral hnua hna chhonzawm lote chu dan loa chawl anga ngaih an ni ang tih thuchhuahah chuan tarlan a ni a.

DP&AR Office Memorandum tarlan dan chuan, sorkar hnathawk zingah hun rei tak tak aikal chhawr te chu mahni hna ngaihthahna a nih thu te, mahni hna thawk tha duh lote chu CCS (Conduct) Rules, 1964 hmanga hrem theih an nih thu te, aikal late chungah sorkarin dan anga action a lak dawn thu te, kumin June ni 6-a Council of

Minister thukhawmin aikal lâk rêng rêng titawp vek turin thutlukna a siam thute a chuang a ni.

Sorkar hnathawk aikal late chungchangah a tul anga hma la tur leh bawhzui turin department hotute chu hriattir an ni a, an bawhzui dan chu hriattirna chhuah atanga ni 45 chungin DR&AR-ah thehlut tura tih an ni. Damlo leh natna khirh neite chu hriatthiamna a awm dawn a, dan angin chawlh an neih ang zawng zawng an lak phalsak an ni dawn a. Damlo leh natna khirh tuartute chu Medical Board atanga Medical Certificate of Incapacity laa thehlut tura chah an ni a, an dinhmun a zirin ngaihnhathiamna pek theih an ni ang.

Tun dinhmuna aikal la mek, an hna thawh chhuanzawm duh lote tan CCS (Pension) Rules 1972 angin voluntary retirement, invalid pension leh compulsory retirement-te dil leh pek theih a ni dawn a, dan awm sa anga chawl thei lote tan Special Voluntary Retirement Scheme siam tum a ni bawk.

Sorkar hnathawk aikal late ni 30 chhunga an hna chhonzawm tura hriattirna hian Mizoram sorkar hnuai hnathawk zawng zawng - regular employee, co-terminus (CSS), part time, casual, work charged, contract leh provisional employee te a huam vek a ni.

<><><>

LADC

Lai Autonomous District Council a MDC pakua ten ZPM zawmin vawiin khan ZPM Gen Hqrs a Vice President Pu W.Chhuanawma MLA chuan a lawmlut.

Lawmluhna inkhawm, LADC Hall, Lawngtlai a neih hi Pu H.Lungrualkima Treasurer ZPM Lai District Hqrs. chuan kaihruiin, Pu W.Chhuanawma chuan LADC ah Sorkarna siamthei an awm mumalloh lai khan ZPM chuan State a rorellai an nih angin LADC ah Sorkarna siamturin hma a lalo tih sawiin, Autonomous District Council zahawmna humhim chu ZPM in a duh vangin Party dangten an Sorkar laia Autonomous District Council a an Party sorkar tir phet an tum thin ang khan ZPM chuan tha a ti tivelu a, tunah MDC pakua laiin ZPM ah rinna nghata an zawm ta chu lawmawm a tihthu sawiin, ZPM chuan Party ah an lawmluh ngailoh thu leh an Policy tawmpuitute chu Policy ah an lawmlut thin niin a sawi bawk

Lai Autonomous District Council a MDC nilai pakua ZPM zawmtute hi kumin April ni 4 a MNF Party chhuahsantute an ni a, MDC pasarih, Pu Manghmunga Chinzah, Pu T.Lalengmuana, Pu V.Zathanga, Pu BN Thangpuia, Pu Tutura Singh, Pu L.Lalmachhuana leh Pu C.L.Lianzuala te bakah Independent MDC pahnih Pu N.Zangura leh Pu L.R.Dingliana Chinzah te an ni.

Elected Member 25 nei thei Lai Autonomous District Council ah hian Lawngtlai Chandmary bial ah by election neihtur niin, tun dinhmun ah Elected Member 24 an awm a, Congress Member pakhat leh MNF Member 12 ten Congress Member CEM kaihruiina hnuai an Sorkar mek a, vawiin a MDC pakua ZPM zawmte bak ah hian ZPM chuan MDC pakhat a lo neihsa nen MDC 10 neiin, BJP, MDC pakhat awm bawkin eptu lam ah MDC 11 an awm mek.

MDC pakua, lawmluhna inkhawm ah hian Lawngtlai East bialtu MLA, Adviser to Chief Minister Dr.Lorrain Lalpekliana Chinzah, Pu MC Lalramchhana President ZPM Lai Dist. Hqrs bak ah lawmluhte atangin thusawi ngaihthlak a ni.

<><><>

CHHINGCHHIP FRUIT

ZPM sawrkar hnuah a vawi khat nan Chhingchhip-a Fruit Juice Concentrate Plant-ah vawiin khan sapthei sawr tan a ni a,

MIFCO Chairman Pu Lalthazuala Rawite chuan vawiin khan Chhingchhip-a Fruit Juice Concentrate Plant hi tlawhin he hmun tuaitharna turin sum awm se la chuan lian zawka hmalakna kalpui theih a nih thu a sawi.

Mizoram Food & Allied Industries Corporation Limited (MIFCO) hnuai Fruit Juice Concentrate Plant hi 26th January, 1993 khan din a ni tawh a, thei chi hrang hrang sawngbawlina turin khawl leh mamawh tam tak lei ni tawh mahse hman loha dah tawl tam tak a awm a, hengte hi tangkai taka hman a nih theih thu sawiin Pu Lalthazuala Rawite chuan, 'Sum chu awm se heng khawl zawng zawng hi tangkai

taka hman theih tur an ni a, MIFCO tangkaina leh Mizoram hmasawna tura a thawhhlawk zia pawh hmuh thuai a ni ang a ti a. Tun dinhmunah erawh bul tan thar leh chauh a nih avangin hmabak a tam hle a ni, a ti.

Tuna sapthei tui an sawr mek chu enchain nan Chawngtlai khua atangin Kg 1, Rs.30 in an lei a, Sapthei bakah Lakhuihthei pawh sawr an tum tih sawiin, he hmunah hian sawr theih chi thei chi hrang hrang pawh sawngbawl theih beisei a ni, a ti.

Heng bakah hian Baibing leh Rawtuai te pawh a Tin-a siam theih a ni bawk a, kum tam tak MIFCO hi kalpui ni tawhin, la hlawhtling hlei thei rih lo mahse ZPM Policy a nih avangin hlawhtlinpui an tum tlat dawn a ni," a ti.

Chhingchhip khaw daia Mizoram Food Park ah hian tun dinhmunah hnathawk 6 an awm mek a, MIFCO hnuaiah hian hnathawktu tun dinhmunah 24 an awm mek a ni.

<><><>

HOOCH TRAGEDY

Tamil Nadu-ah zu chhe in avangin mi 35 an thi. Vanduaina thlenna hmun hi Kallkurichi hmunah niin mi 100 chuang zu chhe in avang hian damdawiinah enkawl mek an ni a. He vanduaina thleng avang hian sawrkar official 10 te chu an hna atanga suspend an ni a. An zingah hian DSP pakhat pawh a tel a ni.

Tamil Nadu sawrkar chuan Kallakurichi ah hian SP pasarih leh police mi leh sa 1000 chuang an dahlut nghal a. Health Minister M Subramaniam chuan vanduaina thlen chhanah hian zu in tura methanol tel tam lutuk chu a chhan ber anih thu a sawi a. He vanduaina thleng hi chhui nghal anih thu leh mawhphurtu chu na taka hrem anih tur thu a sawi.

Tamil Nadu sawrkar chuan zu chhe in avanga thi te hi cheng nuai 10 theuha ral an nih tur thu leh damlo damdawiina enkawl mekte chu cheng sing nga theuha kan an nih tur thu a sawi a ni. Tamil Nadu Chief Minsiter MK Stalin chuan vanduaina thleng chu pawl atih thu leh dankalha zu zawrh chu na takin an do dawn a ti.

<><><>

BIHAR

Bihar-a Patna High Court chuan Bihar sawrkarin sawrkar hna leh zirnaa backward class te tana chanvo a hauhsak reservation zat zaa 50 atanga zaa 65-a a tihpun chu a hnawl sak.

Chief Justice K.Vinod Chandran leh Justice Harish Kumar-te awmna bench chuan kumin March ni 11 khan he sawrkar hmalakna khinna hrang hrangte ngaithlain thutlukna a siam mai lova. Sawrkarin ackward classes, extremely backward classes, scheduled castes, and scheduled tribes (SCs and STs) te tana zaa 50 atanga 65-a chanvo hauhsakna tihpun a tum chu ram danpui kalh a ni tiin Court ah hian an khing a ni.

He dan thar hi state legislature-ah ngaihtuah anih hnuaah nikum November thla khan reservation tihsanna dan thar hi tihchhuah a ni a. Economically Weaker Section (EWS) ten tuna reservation zaa 10 an neih mek nen avaiin reservation siam hi zaa 75 a tling a ni.

<><><>